

**Qimmit qimuttut kiisalu qimmeqarneq qitsuuteqarnerlu pillugit Inatsisartut
inatsisaannut allannguutissatut siunnersuut**
(Inuussutissarsiornermut Suliffeqarnermullu Naalakkersuisoq)

pillugu

Inuussutissarsiornermut Ataatsimiititaliap

ISUMALIUTISSIISSUTAA

Siunnersuutip aappassaaneerpeqarnerani saqqummiunneqartoq

Inuussutissarsiornermut Ataatsimiititaliaq siunnersuummik kingullermik suliarinninnermini ukuninnga inuttaqarpoq:

Inatsisartunut ilaasortaq Aqqaluaq Egede, siulitt., Inuit Ataqtatigiit
Inatsisartunut ilaasortaq Niels Thomsen, siulitt. tullia, Demokraatit
Inatsisartunut ilaasortaq Naaja Nathanielsen, Inuit Ataqtatigiit
Inatsisartunut ilaasortaq Akitsinguaq Olsen, Siumut
Inatsisartunut ilaasortaq Kim Kielsen, Siumut

1. Siunnersuutip siullermeerneqarnera

Siunnersuut siullermeerneqarmat inatsisissatut siunnersuutip imarisaanut partiit oqaaseqartartui ataatsimut isigalugu isumaqataasut ataatsimiititaliap paasivaa.

2. Siunnersuutip imarisaa siunertaalu

Kommunik aaqquusseqqinneq qimuttunik qimmeqarfiit killeqarfiisa allanngortinneqarnissaannik pisariaqalersitsivoq, tassami kommuneqarfiit killeqarfigisimasaat atorlugit taakku killeqarfiligaanerat naapertuukkunnaarmat. Taamaattumik inatsisissatut siunnersuummi siunnersuutigineqarpoq qimuttunik qimmeqarfiit ima killeqarfilersorneqassasut: Kitaani, Avannaani sumiiffik allorniusap sanimukaartup 66-iata avannaatungaa, kiisalu Tunu tamakkerlugu kujammut Nunap Isuata kangia angullugu allorniusap tukimukaartup kitaatungaani 44-ruat tikillugu. Tamatuma saniatigut qimmit pitussimangitsut taarsiisussaatisinertaqanngitsumik toqunneqartarnerat pillugu aalajangersakkap allanngortinneqarneranik inatsisissatut siunnersuut imaqarpoq, taamaalilluni aalajangersakkap oqaasertai piginnittusaanerup innarlerneqannginnissaa pillugu Inatsisini Tunngaviusuni § 73, imm. 1-imut naapertuuttunngortillugit. Tamatuma kingorna qimmit pitussimangitsut qaasuttumik pissusilersorlutik allanik navianartorsiorititsisutut isigineqartut kisimik taarsiisussaatisinertaqanngitsumik toqunneqarsinnaassapput. Tamatuma saniatigut qimminik qimuttunik tuloriaajaaneq inerteqqutaalissaaq, taamaaliortarneq iluaqutissartaqanngimmat. Kiisalu pingaarnepaatullu kiitilluni ajutoortoqarneranut atatillugu qimmiutillit pinngitsooratik akisussaatinneqartarnissaat maanna atuuttoq inatsisissatut siunnersuummi attatiinnarneqarpoq.

3. Siunnersuutip tusarniaassutigineqarnera

Nalinginnaasumik nassuiaatit ataanni tusarniaaneq pillugu immikkoortoq malillugu siunnersuut ukununga tusarniaassutigineqarsimavoq: Naalackersuisoqarfiit tamakkerlugit, KANUKOKA, Kalaallit Nunaanni Eqqartuussiveqarfik, Kalaallit Nunaanni Politimesteri, Ilisimatusarfik, Pinngortitaleriffik, NUSUKA, K.N.A.P.K., K.N.Q.K., Sulisitsisut Peqatigiiffiat, S.I.K., Kalaallit Nunaanni Takornariaqarnermi Inuussutissarsiornermilu siunnersuisoqatigiit, Nunatsinni Advokatit, Eqqartuussissuserivik Malling, Damm & - Meinel aamma Tove Søvdahl Pedersen.

Paasissutissat inatsisissatut siunnersuutip tusarniaassutigineqarnera pillugu nalinginnaasumik nassuiaatini oqaatigineqartut eqqoqqissaarnerat pillugu oqaaseqalaarnissaminut ataatsimiititaliaq tunngavissaqarsoraaq. Inatsisissatut siunnersuut naalackersuisoqarfinnut tamanut tusarniutigalugu nassiunneqarsimasoq nalinginnaasumik nassuiaatini oqaatigineqarpoq. Paasissutissaq taanna pisariaqarneratut erseqqitsigisumik allanneqarsimanngilaq. Tusarniaanermi peqataaqquneqartut tamarmik nalunaarsorneqartariaqartut ataatsimiititaliaq isumaqarpoq, taamaalilluni qanoq amerlatigisut tusarniarneqarsimanersut pillugu inatsisiliortut tamakkiisumik takussutissinneqarsinnaaqqullugit. Tusarniaaffigisat sorliit tusarniaanermut akissuteqarsimanersut nalinginnaasumik nassuiaatini aamma oqaatigineqartariaqarpoq. Aammattaaq taaguut "Ilisimatusarfik/Universitetet" nalinginnaasumik nassuiaatini allasimasoq Ilisimatusarfimmik allanneqartariaqartoq ataatsimiititaliaq isumaqarpoq. Aamma taamaappoq "Naturinstituttet"-imut atatillugu. www.natur.gl-imi allagarsiussakkut takutinneqarpoq suliffeqarfik imminut "Grønlands Naturinstitut"-imik taagortoq, taannalu suliffeqarfiup danskisut taaguutigaa eqqortoq. Taama oqaaseqarluni tusarniaaneq ataatsimiititaliamit tusaatissatut tiguneqarpoq.

4. Ataatsimiititaliap siunnersuummik suliarinninnera

Qimmit qimuttut kiisalu qimmeqarnek qitsuuteqarnerlu pillugit Inatsisartut inatsisaata allanngortinneqarnissaanik siunnersuut iluarsisat Naalackersuisut UKA10-mi saqqummiuteqqikkaat ataatsimiititaliap maluginiarpa. Allannguutissatut siunnersuut 2009-mi ukiakkut ataatsimiinnermi saqqummiunneqartoq kiitilluni ajutoortoqartillugu qimmiutillit pinngitsooratik akisussaatinneqartarnerat atorunnaarsillugu mianersuaalliornermik tunngavimmik (culpa-princip) taarserneqarnissaanik aalajangersakkamik imaqarpoq. Taamani allannguut taanna qitiusumik tusarniaaffigisanit, tassunga ilanngullugu Politimesterimit eqqarsarnartoqartinneqarpoq. Siunnersuutip ilaa taanna iluarsineqartariaqartoq Politimesteri assigalugu taamani Inuussutissarsiornermut Ataatsimiititaliaq isumaqarpoq.

Allannguutissatut siunnersuutip ilaa taanna Naalackersuisut tunuarteriarlugu pinngitsoorani akisussaatinneqarnissaq allannguutissatut siunnersuummi iluarsisami attatiinnarniarmassuk ataatsimiititaliap naammagisimaarlugu maluginiarpa. Taamaattumik allannguutissatut siunnersuutaasimasoq pillugu nangaassutit eqqarsarnartoqartinneqartullu taamani Inuussutissarsiornermut Ataatsimiititaliaasup oqaatigisai Naalackersuisunit malinneqarput. KANUKOKA tusarniaanermut akissuteqarnissaminut tunngavissaqartitsisimannngitsoq ataatsimiititaliamit maluginiarneqarpoq. Ataatsimiititaliap tamanna ima paasivaa qimmiuteqarnek pillugu ileqqoreqqusanik il.il. atuutsitsilernissamut maanna kommunit pisinnaatitaaffiat eqqarsaatigalugu allannguutissatut siunnersuummi aalajangersakkat amerlanngitsut atortussatigut tunngaviusumillu allannguutinik imaqqanngitsutut KANUKOKA-mit isigineqartut.


5. Siunnersuutip aningaasaqarnikkut kingunerisassai

Siunnersuut aningaasaqarnikkut kinguneqassanersoq ataatsimiititaliamit isumaliutigineqarsimavoq. Aningaasaqarnikkut pitsaanngitsumik sunniutaasinnaasut saqqummiussissummi nalinginnaasumilluunniit nassuiaatini Naalakkersuisut tikkuussinngimmata taamaattoqarnissaa ataatsimiititaliamit ilimagineqanngilaq.

6. Ataatsimiititaliap inassuteqaataa


Siunnersuut akuersissutigineqassasoq ataatsimiititaliamit isumaqatigiittumit inassutigineqarpoq.

Taama oqaaseqarluni isumaliutissiissummilu allassimasutut paasinnilluni Inuussutissarsiornermut Ataatsimiititaliap siunnersuut aappassaaniigassanngortippaa.



Aqqaluaq Egede

Siulittaasoq



Niels Thomsen



Naaja Nathanielsen



Akitsinnguaq Olsen



Kim Kielsen